

Sier Andrea Trivixan el cavalier, savio dil Consejo, qu. sier Thomà procurator	65. 98
Sier Sigismondo di Cavali fo proveditor in campo, qu. sier Nicolò.	31.137
Sier Beneto Valier fo capitano a Zara, qu. sier Antonio	25.147
Sier Alvixe Barbaro fo capitano a Bergamo, qu. sier Zacaria cavalier e procurator	29.142
Sier Francesco da cha' da Pexaro è capitano a Padoa, qu. sier Marco.	71. 97
Sier Polo Nani fo capitano a Bergamo, qu. sier Zorzi.	84. 87

Fu posto, per il Serenissimo, Consieri, Cai di LX e Savii una parte, che tutti quelli vieneno in Pregadi per cadauna raxon e caxon, et cussi quelli sono in li officii et Consegii in la terra debbano portar bollettini non esser debitori in tre officii, Cazude, Raxon nuove et Governadori, sì in nome loro qual di so' padri, in termine e per tutto il mexe presente, et non li portando siano privi di officii et Consegii dove i sono, *ut in parte*; la qual non se intendi presa se la non sarà presa e posta nel Mazor Consejo. Fu presa. Ave, la copia di la qual parte noterò qui avanti.

Et poi a hore 23 e meza fo licentiatu il Pregadi, et restò Consejo di X con la Zonta ordinaria per danari. Et *tamen* non concluseno alcuna cossa.

Dil proveditor Moro, da Roato, di 6. Come, zonto li, havia messo homini d' arme a Ponteio e Palazuol, et ai Urzinuovi 100 cavali lizieri et 100 altri su le ripe di Ada. Scrive ha fanti 1200 con lui, il resto sono in Crema. Dimanda danari per pagar le zente, ducati 11 milia. *Item*, quelli di Lodi ha sachizà 3 ville dil cremasco; et che volendo la Signoria, il signor Janes li farà a l' incontro. Lauda sì tegni 2000 fanti di le vallade in Bergamo.

Di Crema. Come quelli di Lodi si fortificavano dentro, et butavano uno ponte sopra Ada, non si sà a che effecto.

Fo parlà in Collegio. Alcuni voleva sier Lorenzo Bragadin capitano di Brexa andasse proveditor in bressana e il Moro passasse Ada. Sier Zorzi Corner cavalier procurator savio dil Consejo disse: « Volemo far proveditor il Bragadin, non sa cavalear? »

237 *A di 9.* La matina, fo il Marti di carlevar, non fo alcuna lettera da conto, et vene in Collegio sier Piero da cha' da Pexaro procurator rimasto Proveditor zenaral in campo, dicendo scusarsi non poter

andar, et vol pagar la pena; *tamen* che 'l dirà al Pregadi la causa del suo refudar, et tien sarà ad-messa la soa scusa. Et cussi fo terminato far doman Pregadi per questo.

Da poi disnar, nulla fu, nè fo alcuna lettera, et cussi passò il carlevar, qual fu molto magrissimo. La carne de manzo ha valso questa matina, et poca, soldi 4 la lira, le galine soldi 4 el paro.

È stà fato da Marzo in quà noze para numero et è morti zentilhomeni che venivano a Consejo in questo anno da Marti in quà numero

Di Crema, di 7. Che li fanti di Lodi si parteno.

Del proveditor Moro, di 7. Come, passando quelli di Lodi per venir a nostri danni, non si man-carà far, etc.

A di 10. Primo di de quaresima. *Fo lettere di campo, da Melz, di 8, hore 15.* Come si levavano per Marignano, e scritto al ducha di Milan provedi di vietuarie, e alozamenti, perchè non hanno trabache nè pavioni da star a la campagna. *Item*, esso Proveditor non si sentiva.

Da Milan, di sier Carlo Contarini orator, di 8. Come erano ussiti di Milan parte di l' exercito et andati ad alozar a Binasco, et il Vicerè usirà con il resto, et aspecta il conzonzer di le nostre zente con loro. Francesi è a Biagrassa, et hanno aterrà parte de le rive dil Navilio, et si dice *etiam* hanno mandato di là da Texin parte di le zente de arme loro; ch'è segno voleno levarsi et passar Texin. *Item*, il signor ducha di Barbon, qual da Zenoa vene a Pavia, è venuto più avanti in uno locho ditto et verà in campo a Binasco. *Item*, altre particularità *ut in litteris*.

Fo parlato in Collegio di expedir l' orator di le tre lige di sguizari, et donarli 100 raynes et pagarli la spexa dove l' è alozato. *Item*, leto una lettera si risponde a essi sguizari a la lettera portata per lui in Collegio questa matina.

Da poi disnar, fo Pregadi, et ordinà Consejo di X con la Zonta ordinaria in materia de danari, et lecto le lettere sopra scripture, et di più questo:

Di campo, di 8, hore 12, da Marignan. Come el proveditor Emo sta meglio, nè dice altro dil suo mal; *solum* che milanesi hanno preparato li alozamenti a le nostre gente in certi lochi propinqui a Binasco, et che dieno far un consulto *quid agendum*, et sarà *etiam* il ducha di Barbon. Francesi hanno fato uno altro ponte sopra Texin appresso il vechio e si tien anderano di là. *Item*, come partiva col campo per Binasco, e che don Hugo di Moncada,